

La Ciasa de Palsa Ojöp Frëinademetz tól sö d'istë studënc y studëntes dai 16 ai 19 agn por **sorvisc de voluntariat** por 6/8 edemes che reverda plö ciamps de laur. Infos al numer 0474 524786. Le formular de domanda da dé jö cina ai 16.05.2017 pon desciarié da www.ciasadepalsa.it.

Seniorenparc: le comun de Badia lascia alsavëi che al mët indô man l'ativité al Seniorenparc da La Ila por la jënt de tëm; vigni mercui dales 10 ales 11:30. Prenotaziuns por le pulmino, che passa a tó i senioren y i condüje indô zeruch, pro lgi nr. 348 4096357 o Ubi nr. 338 3462087.

Le zënter sozial "La Spona" inviëia ai 10 de ma al de dla porta daverta por i 30 agn dl salf protezioné a Pidro dales 09:00 ales 14:30 cun teatri, informaziuns, films sura les ativités y n bufé.

La biblioteca Sas dla Crusc inviëia al'ora dles stories por mituns/mitans da 6 a 10 agn te biblioteca a La Ila en lünesc ai 8 de ma dales 15:00.

Consulënza tl marcé y tl monn dl laur: le Sorvisc ai Jogn Val Badia lascia alsavëi che chësta consulënza cun Giorgio Costabiei sará en mercui ai 10 de ma dales 15.30 ales 17.00 tl zënter Saj.un a La Ila. Informaziuns te Sorvisc ai Jogn al numer 0474/523070.

„Isté deboriada“: tla 5.edema tl paisc da La Val (7 – 11 de agost) él ciamó valgügn posc. Iscriziuns sot www.proiec.org o te Sorvisc ai Jogn.


Curs da porté i pici a La Val te comun ai 9 de ma (09:30 - 11:30). Le curs é limité a 4 porsones. Infos y prenotaziuns al nr. 338/7173577.

Referat: *“Tö t'es tan vedl che te sëntes”* ai 9 de ma dales 20:00 te scora mesana a La Ila cun Susanne Steidl.

Udiënza dla defensuria zivica: en vëndres ai 12 de ma dales 14.30 ales 16.00, a San Martin te Ciasa de Comun. Info: tel 0471301155.

Udiënza dl Zenter Consumadus: a Picolin tl Raiun Sozial en jöbia ai 11 de ma dales 09.00 ales 12.00. Info y prenotaziun al tel. 0474 524517.

Seniorenwoche in der Cusanus Akademie vom Mo. 15.05. bis Fr. 19.05.2017. Anmeldungen unter 0472 832204 oder info@cusanus.bz.it.



Plata dla Ploania

Badia

San Iaco - San Linert

Ploan: Siur Iaco Wendelin Willeit

Calonia Badia: 0471/839571

E-Mail: parrocchiabadia@libero.it

Radio dla Ploania: 91,10 Mhz

UNITÉ PASTORALA



www.unitepastorala.org

Ann „A“ 07.05. - 14.05.2017 4° Domënia de Pasca n. 24

De dles vocaziuns

Herr, wir glauben dass du Menschen
in deinen Dienst rufst.

Dabei bedienst du dich auch unserer
Worte und Taten.

Durch uns sollen Menschen zu dir
finden, damit du sie in deinen Dienst
nehmen kannst.

Mach uns zu Wegweisern für dich.



Vangele dla Domënia che vëgn - 5° Domënia de Pasca

Ian 14, 1-12

Te chël tëm á Gejú dit a sü discepu: Osc cör ne se lasces nia turbé. Cherdede te Dî y cherdede te me! Tla ciasa de mi Pere él tröpes abitaziuns. Sc'ara ne foss nia insciö, ves essi dit dailó: I vá a ves arjigné ca n post? Canch'i sarun jü y ves ará arjigné ca n post, vëgni indô, y i ves condüji da me, por ch'i sëise ince os, olache iö sun. Y olache iö vá chël tru conescëise pö.

Tomesc ti á dit: Signur, i ne savun nia olache te vas. Cö dësson pa spo conësce le tru? Gejú ti á dit: Iö sun le tru y la verité y la vita; degügn ne röia dal Pere ater co tres me. Canch'i m'arëis conesciü, conesciarëise ince mi Pere. Bele sëgn le conescëise y l'ëise odü. Filipus ti á dit: Signur, móstresse le Pere; chësc nes basta. Gejú ti á respognü: Bele tan dí sunsi pro os, y te ne m'as nia conesciü, Filipus? Chël che á odü me, á odü le Pere. Co sciafieste pa da dí: Móstresse le Pere? Ne créieste nia, che iö sun tl Pere y che le Pere é te me? Les parores che iö ves diji, ne diji nia da me infora. Le Pere, che é te me, ademplësc sües opres. Cherdédeme pö, che iö sun tl Pere y che le Pere é te me; sce nia, spo cherdede almanco por gauja dles opres! Amen, amen, i ves diji: Chël che crei te me, fajará ince les opres che iö feji, y al nen fajará ciamó de maius, deache iö va dal Pere.

FUNZIUNS SACRES

07.05. 4^a DOMËNIA de PASCA – De mondial dles vocaziuns

S. Florian / Patron di Stödafüch

- 10.00 Mëssa por i Stödafüch cun benedisciun de auti y motors
14.00 Prozesciun a Oies
18.00 por perié do vocaziuns
†to Friedl Valentin
†ti Dapunt dla Villa Erna

08.05. Lünesc - S.ta Ulrike

19.30 *Devoziun de ma (arjignada ca dala uniun di ëi)*

09.05. Mertesc

19.30 †ta Maria Burchia (dala uniun dles ëles)
†ta Zenzl Pitscheider
por les families Dapunt de Sotvalgiarëi

10.05. Mercui - Mëssa cun i scolars

07.30 †to Gottfried Costa – aniversar
†to Siegfried Winkler
†to Paul Frenademetz

11.05. Jöbia – Mëssa cun i crejimanc

19.30 †ta Veneranda Ferdigg
†to Pire Devall
†ti Egidio, Maria y Sepl Valentin

12.05. Vëndres - S.Pancraz

07.30 †to Sepl Pizzinini de Costa
por plö families en onur de S. Antone
por les animes dl purgatore

13.05. Sabeda - S.Servaz - S.ta Maria da Fatima

16.00 Mëssa a Oies
19.30 *Devoziun de ma (arjignada ca da Legio Mariae)*



14.05. 5^a DOMËNIA de PASCA – PRÜMA COMUNIUN

“ De dla Uma “

- 09.45 *dan Colonia*: salüt y ingres te dlijia di neocomunicanc
10.00 **Mëssa cun i mituns dla 1^a Comuniun y families**
15.00 Festa da Bato
18.00 †ti siur Leo Munter, siur Fonjo Tasser y siur Laurënz Irsara
por fam. Paul y Rosina Dapunt
en onur de S. Ujöp da Oies

Dala VITA dla CÛRA

Gran Incuntada de düta la valada en preparaziun dla vijita pastorala cun siur Eugen Runggaldier, vicar general

i mëisc d'otober y novëmer vëgn le vëSCO Ivo Muser a vijité nosta Unité pastorala cun sües ploanies. Adüm a sü colauradusc ti jarál plö sot a trëi tematches, dües de chëles che gnará da nostes propostes:

en sabeda, 13 de ma dales 08.30 – 12.30 tl Istitut Ladin a San Martin.

Al é na incuntada cun düta la jënt, cun düc chi ch'á interes. Al é dërt sce i portun ite nostes propostes, nostes idees, nösc debojëgns; porchël tolesse le tëmp y gnide. Plö ch'i sun y plö ch'i arjunjun....

Prozesciun a Oies: chësta domënia, ai 07 de ma, de mondial dles vocaziuns, inviunse düc dales 14:00 ala prozesciun da S. Linert a Oies por perié do vocaziuns. A Oies sarál na picera funziun.

Prozesciun da Porsenú a Neustift cun santa mëssa: l'uniun dl Decanat Val Badia inviëia düc i ëi y i jogn a tó pert en sabeda ai 13 de ma. An se abina dales 21:00 a Porsenú/Aquarena y al sará ince na coriera che péia ia da Pedraces dales 19:00. Prenotesse al nr. 333 7247516 cina ai 11 de ma.

Consëi de Cûra: al se abina en mertesc sëra ai 09 de ma y al nes recorda che ai 22 de otober sarál la festa di iubilars de matrimone.

Lavé la dlijia: periun düc chi che pó (al butés ince val' ël), mo dandadüt i **geniturs di mituns che vá ala 1^a Comuniun y ala Crejima**, de gní en mertesc ai 09 de ma dales 08:00 a daidé.

Oferta: dër bel giulan che ëise sostegnü le clero cun l'offerta de 266,34 €.

Referat „Papa Francesco: un anziano rimasto giovane“ cun don Paolo Renner en lünesc ai 08 de ma dales 15:00 te Istitut Ladin a S. Martin L'Uniun di Seniores da San Martin / Antermëia inviëia düc dër bel.

Romené sö le paisc: inviun düc en sabeda, ai 13.05.2017 y s'incuntun dan magazin di stödafüch dales 08:30, olach' al gnará coordiné i laurs. Cun l'Assoziaziun Turistica dl Comun de Badia gnará dedô organisé na grillada por düc chi che daida y na picera lotaria por i mituns.